

thuislozen

Motibonan pa bin biba den e hospital bieu

Segun e portabos tin persona ku tin 7 aña of mas ta biba den e lugá i tambe tin ku tin menos ku 1 aña. E motibonan ku a pone e personanan skohe pa biba den hospital bieu ta diverso; problemanan ku kasá, yiu, famia of doño di kas, divorzio, entrada insuficiente pa paga hür òf falta di vivienda.

E grupo aki ta biba hunto manera ruman; un ta yuda otro ku su problemanan. Hopi biaha e personanan ta kompartí kuminda of kompra, pasobra e plaka di ònderstant no ta yega pa kumpra hopi kos bo so. Mayoría di e personanan ku ta biba den e lugá tin karchi di dòkter. Esaki ta un gasto menos, meskos ko no ta paga koriente ni awa.

Ayudo

Varios biaha nan a bai serka e diputadonan pa papia riba nan situashon, pero ta tur ora nan tabata den reunion of no tabatin tempo pa nan.

Na ougustus aña pasá un komishon bou di presidensia di sr. Walter Kramers (èks-komisario interino di polis) a hasi un investigashon pa traha un rapòrt pa gobièrno (B.C.). Den e komishon aki tabatin empleadonan di Cuido Social, Fundashon Cas pa Comunidad i Polis. Tambe tin un "wijkverpleegster" ta bishitá e ansianonan i nan a pidi'e pa buska un manera pa yuda nan haya un luga den Maris Stella of paviliun. Tambe tin un señora den ròstul.

Edukashon

Hopi di e personanan a siña un ofishi, pero no por traha pa via ku nan a pèrdè trabou i no por haya otro, of tin edat avansá of tin problemanan ku salú. De bes en kuando nan ta haya un "job", pero nan no ta gana masha kos y tin biaha nan ta haya bebida komo pago.

Divertishon

Parti mainta nan no por hasi mucho kos, pasobra tin un skol ei banda i nan no mag di stroba e lèsnan. Parti mèrdia nan ta hunga dominó, konta chiste, wak telebishon. Tin biaha nan ta sali bai bishita famia of amigo, keiro den kaya of piska na waf. No ta resta plaka pa divertí di un otro forma. Parti anochi tin un



grupo ta deskansá mientras ku un otro grupo chikito ta kana rònt fungiendo komo "bewaker".

Relashon ku e grupo parti dilanti

E relashon no ta mucho bon, no tin mucho kontakto. E personanan di parti

patras no ta bai serka esunnan dilanti. Segun nan, e hendenan aki ta kana echa baina, rechèrche ta bin i den korant bo ta lesa despues ku e hendenan den hospital bieu ta hasi fastioso. Prensa ta duna informashon negativo di e habitantenan di hospital bieu i no ta hasi distinsjon entre e bon- i malonan.

De e parti dilanti tin alrededor di 10 persona, entre nan mucha i beibi. E ambiente ta masha malo pa lanta un famia, pasobra e personan ta droga. E luga ta ahigiéniko, ta holer masha malo i esei por trese enfermedat.

Rapòrt

Despues ku nos tabatin e kombersashon ku e habitantenan di e parti patras di hospital bieu, nos a bai papia ku sr. Mito Croes, pa sa posishon di gobièrno riba e asunto aki. Tambe nos a puntra sr. Croes kua ta e solushon(nan) posibel riba término korto.

Puntrando sr. Croes riba e contenido di rapòrt ku un komishon a traha pa gobièrno aña pasá, el a duna di konosé ku esaki nunka a keda tratá den un reunion di Consejo Insular. E rapòrt ta kontené algun informashon i konseho di parti di e instansianan ku a yuda trah'e, pero ku esaki no ta sufisiente pa por solushoná e problema. E komishon ta(bata) di opinion, ku gobièrno por drecha e parti dilanti di e hospital bieu i hinka e personanan sin kas temporalmente aden pa despues sigui drecha e resto di e edifisio. E periodo di konstruksion



clochards

homeless

hon pa e promé parti lo tuma alrededor di 3 luna i e kostonan ta kalkulá na f.100.000,-.

Ora ku e "opvangcentrum" ta kla ta disidi ken ta bin na remarka pa keda definitivamente. Esaki lo sosodé segun kriteria poní di antemano dor di e instansianan: Servisio Sosial Psikiátriko, Departamento pa kombati mal uso di alkohòl i Cuido Sosial. Lo mester bin un persona ku ta wak pa tur kos bai segun regla, un sorto di "concierge". Ademas e habitantenan di e lugar mester duna 3/4 parti di nan entrada pa biba den e lugar. Sr. Croes ta di opinion ku e rapòrt ta laga hopi pregunta sin kontestá: p.e. Kua ta e kriterianan pa atmiti of rechasa un persona? Si un persona no kumpli ku e reglanan di e sentro, kiko ta pasa ku ne? Si un persona no por kontribuí ku e parti finansiero, lo sak'e afó?

ituashon di hospital bieu

Segun sr. Croes e problema di e personanan ku ta biba den hospital bieu no ta algo ku ta pasa na Aruba so. Tur pais grandi tin di aber ku e problema aki sin ku nan por solushon'e te na fondo. Algun aña pasa tabatin e kaso di e personanan di Alameda ku no tabata un bista bunita pa nos komunidad. No por a solushoná esaki i awor el a bira un parti akseptá pa komunidad.

Den e kaso di hospital bieu mester wak e motivashon di e personanan pa biba ei den. No ta trata di problema di vivienda so, pero tambe di karakter finansiero i sosial. Na e momento aki el a bira un problema i bo no ta solushoná nada dor di basha e luga abou of saka e hendenan afó. E úniko kos ku bo ta logra ta ku e problema ta bai otro kaminda.

Gobierno a haya e edifisio for di obispado ku kondishon ku e mester us'e, pero gobierno no a hasi uso di dje i el a dekaí. E ora a krea e posibilidat pa hendenan sin vivienda fiho bin biba aden ku e.o.

konsekuensianan ahigiéniko. Pero e edifisio ta bon i ta brinda hopi posibilidat.

Solushon di e problema?

Gobierno lo bai papia ku e komishon ku a hasi e investigashon pa buska informashon i konseho. Gobierno a papia kaba ku e personanan enkargá ku kursonan di ofishi. Aki e ta pensa ku por hasi uso di personanan ku mester hasi nan parti



práktiko den karpinteria, mètsla, èts, pa drecha e luga. Tambe por usa hende di T.A.V., ku ta kosta gobièrno hopi plaka i no ta funshoná bon. Pa kuminsá esaki ta sali gobièrno mas barata. Na segundo lugá bo ta krea un ofishi pa hopi hende i na terser lugá gobièrno tin un edifisio ku e por usa pa instansianan ku mester di alohamento.

Kuido di ansiano mester di mas lugá. Awor tin 40 à 50 ansiano den Horacio Oduber Hospital ku ta kosta gobièrno f.150,- pa dia pa falta di lokalidat. Den un sentro pa kuido di ansiano e por sali un f.40,- pa f.50,- pa dia.

E hospital bieu ta un lugá sumamente adekuaado pa instansianan sosial. Tin un kushina sentral, por traha un patio p'e ansianonan. Delaster tempo hopi hende di otro isla a bin Aruba en buska di trabou i na momento ku nan no haya nada, nan ta buska ònderstant i karchi di dòkter. Nan no tin lugá pa keda i nan ta bai keda den hospital bieu. Awor ta eksistí e posibilidat den e Status Aparte pa pone kondishonnan di atmishon pa Antiano mes, den e sentido ku tin dos kriteria: mester tin alohamento i entrada. Si un persona no por kumpli ku nan, anto e no por keda Aruba.

Konklushon

Nos ta di opinion ku tin hopi prehuizio i

generalisashon pa ku e hendenan aki di parti di espesialmente prensa i sierto gruponan den komunidad. P'esei nos ta kontento ku tin alomenos un inisio di parti di gobièrno, pa yega na un solushon di e problema aki. Pasobra un di e puntonan fundamental di derechonan humano ta ku tur hende tin derecho ariba un bon vivienda.

Nos ta spera si ku e ideanan aki ta keda konkretisá mas pronto posibel.



desamparados